

少師朱襄毅公督蜀疏草

少師朱襄毅公督蜀疏草卷之四

復渝獻俘疏

欽差提督軍務巡撫四川等處地方都察院右僉都御史臣朱燮元謹題爲仰仗皇威掃清內地並戒循例獻俘并解進得獲器物伏候聖斷處分以彰天討事據四川按察司協理監軍今帶管總理監軍道僉事戴君恩呈奉臣紙牌照得逆賊樊龍張彤等戕殺大吏竊據巖城已九閱月於茲矣今官兵奮勇齊攻堅城克復擒斬

無遺所有得獲樊龍張彤黑蓬頭等首級并生擒石永
高樊友邦樊友臣樊友國張國用胡文榮王光宗等既
經監軍紀功各道驗審已明并何若海周鼎郭鼎鉉羅
朝明通應解獻闕下請旨正法但賊級賊犯頗多途遠
不便盡解似宜分別重輕酌量起解牌仰該道就近會
同協理監軍兵巡上川東道并見在重慶湖廣監軍紀
功分巡荆南道分守武昌道貴州威清兵備道將樊龍
等首級并石永高樊友邦何若海周鼎等一千逆賊黨
逐一再加審驗明確分別某某情罪重大應解赴闕某

某情罪稍次應監候會審就近處決取具歸一供詞以憑會題等因緣總理監軍道副使丘志充病勢不支乞休批允沿途候旨該本道蒙委帶署隨會同四川協理監軍兵巡上川東道副使徐如珂湖廣協理監軍分巡上荆南道叅政盧英田協理監軍武昌兵備道副使張孝貴州協理監軍威清兵備道按察使楊述程審驗得樊龍等身屍首級并逆賊石永高樊友邦何若海周鼎等通共三十名俱於天啓二年五月初四十四二十七二十八等日被官兵先後擒獲解到驗審無異叅看得

樊龍張彤等人本么麼性最兇狡煽奢酋而謀爲反逆
事豈偶然假援遼而明動干戈志不在小戕殺撫道大
吏傷哉流血成渠攻破州縣各城慘矣積屍盈野竊據
我城池自恃地利抗拒我師旅罔識天常遂使三巴半
壁乾坤所在震動四省全勝物力是處騷騷幸天威之
遠播致巖郡之立平元愍束手以就擒易於拉朽逆黨
繫纓而盡戮捷若承蜩事豈人爲孽由自作惡宜解赴
國門用以張皇我武惟是斬獲僞官梁友懷丁崇禮趙
信劉誠王安魏一中周彝牟特羅世選陳友等及生擒

衆賊周順李仲賢友得壽兒等事同叛逆情有重輕且
道途遙遠難以盡解相應酌量起解斬獲者如樊龍張
彤黑蓬頭首級俱應起解生擒者如樊友邦樊友臣樊
友國樊龍之親子也張國用張彤之親子也何若海石
永高周鼎胡文榮王光宗梅占魁徐應舉賊之元謀心
腹也傅文進陳堯峯黃高李齊民熊長庚陳君寵丁汝
登周冕羅金祥伍就湯馬道董三策周汝林任嘉言傅
楫郭鼎鉉王堂王元臣羅朝明賊之同謀親信也以上
三十名俱應一併起解獻俘以正國法若斬獲梁友懷

丁崇禮趙信劉誠等首級及生擒周順李仲賢友得壽
兒等或迫於不得已始從逆而終投降或拘而不能出
外雖然而心實否相應免其起解就近驗查發落等因
併將各犯情節開款呈詳到臣該臣會同總督川湖雲
貴等處軍務兼理糧餉兼制陝西漢中地方兵部右侍
郎兼都察院右僉都御史張我續撫治鄖陽都察院右
僉都御史楊 巡撫陝西都察院右僉都御史呂 巡撫湖廣都察院右僉都御史薛 察看得逆賊樊
龍張彤等蠢爾醜類生而窮兇以小有才作大不法乘

援遼之役而謀動干戈詭稟餉之情以肆行誅戮自矜
天險足恃獰狰若虎負嵎遂謂國法可逃奮怒如螳當
轍置腹心布牙爪據關而守宵旦竭其經營練士卒納
叛亡分地以攻遠近遭其荼毒虔劉無老無少四郊流
血成渠劫掠在官在民各縣積貯若掃盛氣豈忘乎躍
馬雄心不憚於稱孤臣等拮据一身躊躇四顧憤同泣
劍催兵之羽檄手不停披念切枕戈勵衆之苦詞日無
寧晷乃龍等情知危急復於四月朔日泣請救於蘭州
而逆酋聞報張皇隨於五月初旬卽發援於重慶賊方

喜犄角之有賴揭彩以俟我獨笑狂悖之無庸磨礪以
待伏遇我皇上天威赫濯神武宣昭文武同事同心將
士竭謀竭力兵連秦楚餉滿川原遂乃秣馬誓師共矢
沉船之志因而晝攻夜擊人懷背水之奇一戰而危關
立奪棄甲曳兵之黨擒斬不下萬餘再戰而援賊盡驅
扶傷帶死之苗追剿殆無噍類乃賊猶以欲走愚我妄
爲後舉之圖而我卽以許走愚賊密定暗擒之計終徘徊
而難去卒次第以成擒電擊霆馳十路烟霾盡洗根
除蔓剪四方羽翼全摧豈獨瀝納遊魂業已望風而解

去行令狂酋殘喘亦將指日以歸降是真足彰皇上不
世之奇助而更可卜天朝無疆之景運矣所有斬獲逆
犯樊龍張彤黑蓬頭首級三顆法應解獻於國門生擒
何若海石永高樊友邦樊友臣樊友國張國用周鼎胡
文榮王光宗梅占魁徐應舉傅文進陳堯峯黃高李齊
民熊長庚陳君寵丁汝登周冕羅金祥伍就湯馬道董
三策周汝林任嘉言傅楫郭鼎鉉王堂王元臣羅朝明
通共三十名俱係同謀爲逆人犯通應伏誅於闕下但
事同叛逆情有重輕旣經各道會同審驗明白委應分

別起解除梁友懷丁崇禮趙信等首級行令判磔羅貴
李維垣沈朝益羅勝梅受王國重李自新成芳等據各
司道結報或在監染疫或在途抱病物故悉行驗明斬
首梟磔及周順李仲賢等就近發落外其樊龍張彤黑
蓬頭首級三顆如法醢收并逆賊何若海石永高樊友
邦等三十名如法肘鎖議委兵巡下川東監軍道僉事
戴君恩管押赴闕及將得獲器物印信并偽印偽勅割
付共計六十九件併交該道隨本進繳伏乞勅下兵部
議覆其器械印信并偽印偽勅割付等件付內庫交收

何若海石永高樊友邦等行法司會審如果情真罪當
恭候覆請照依律例分別正法周順等行巡按御史會
審明確分別重輕就近發落徑自具奏其樊龍張彤黑
蓬頭首級仍應剉礫與同各犯首級應否傳示天下以
爲上司目犯人等反逆不軌者之戒統候聖裁爲此具
本開坐謹題請

旨

計開

一元兇逆賊三名

樊龍首級一顆查樊龍年五十歲係永寧司人先是奢崇明未得承襲時勢處孤微龍左右與俱極力承奉其於奢寅尤多撫恤及崇明爲宣撫龍以故舊特見親任而寅之事龍比於仲父矣龍生而悍多機謀沉驚不可測其起兵於重慶也寅主之龍發之張彤成漢其成之初奢寅逆謀久蓄獨無釁而動會徵兵援遼取道重慶稱兵一萬索餉如數而四川徐撫院於演武場按

名清查龍與張彤數上稟事直逼公座麾
之不下張彤舉旗數揮黑蓬頭躍馬舞槍
三市擲標刺殺徐撫院而孫叅政駱副使
李副使章知府熊同知洪同知王推官段
知縣等無一得免者矣一時左右文武多
官承舍吏胥人役立斃刀下者屍相枕藉
合城士民屠戮最慘蓋二百餘年來所未
經見者也龍旣發難隨張奢寅僞詔宣諭
士民投降免死建國大梁改元瑞應自稱

大梁總督軍門兼理糧餉經國大都督樊
飛龍鼓吹呵導比於開府令人稱已爲千
歲龍法令酷烈務在必遵一郡男女咸令
椎結辮髮左衽跣足如苗狀有敢爲中華
巾服者立殺之分布部將把守九門外不
得入內不得出有敢放一人出城者立殺
之縉紳士民止許閉戶靜坐道路以目有
敢啓口者殺無赦百姓但遇令出入湯蹈
火唯所發縱有敢遲留參差者殺無赦十

一月內有生員王養心者陽投效用陰欲擒之事機成而偶露龍碎其屍蹂踐之是日所殺百餘人又部下僞中書周君命把守東水門與官兵約但入我爲內應事覺立縛而磔之是日復殺百餘人龍每出入必面貌相類者八九人輿服導從俱無分別夜卧數處人莫測其所在焉初各鎮道會寫諭帖約之射入城中龍亦荅書語多不遜後官兵攻圍益急三監軍遣親信入

城備陳利害以勸誘之龍泣然泣下五月
二十七日三監軍扁舟渡江約其面會而
擒之方訊問間各土司之兵奮槍爭殺而
龍之首級落地矣

張彤首級一顆查張彤年四十二歲永寧司
人先年曾從故總兵劉綎爲把總屢有功
後以其跡弛無良斥去遂投奢酋部下用
事彤體貌魁梧生而驍勇多智謀諳曉兵
法常遊京師宣大遼陽等處私語所知曰

中國雖大顧兵脆弱易與耳舉大事無難也重慶之變雖奢寅蓄念已久彤與樊龍實爲謀主初徐撫院點兵於演武場樊龍以增餉上稟徐撫院令之下龍下歸營彤執一令旗上徐撫院亦令下彤云夫表我兵主令不敢下少頃舉旗數揮四營砲響大噪而上長槍大弩雲簇雨注而院道府縣備極慘毒矣彤卽僞稱大梁總理軍務兼督糧餉節度使職銜出入八轎輿服器

具皆僭用龍鳳性嗜殺左右僕妾小不如意輒支解以殉取一妓鄒長兒置帳下一日偶與羅門子相視彤覺將妓與門子竝磔於市每親點居民登陴巡守稍或趨趨卽斬而剗其腹慘虐殘暴類如此嘗出掠四郊殺人如草歸而子女載道錢帛如山與樊龍競多寡爲笑樂樊龍出掠亦復如是監軍道遣人諭令來降保其不死彤佯許之然故堅持不下也久之兵多斃於矢

石鎮道共扁舟面諭彤欲引兵歸巢不肯降遂散至五月二十七日兵將攻圍甚力彤與樊龍俱先後登道臣之舟比彤入城收拾府庫而樊龍餘黨復反彤亦被殺首級爲官兵所獲

黑蓬頭首級一顆查本犯的名成漢年三十歲永川縣松溉民有膽略力挽千鈞多藝能長槍大刀雙劍勁弩馬步弓矢無所不擅逆寅父子甚信愛之寅每上馬漢負大

刀挾標槍前驅出兵卽爲先鋒樊龍張彤
領兵來渝寅遣漢與俱知非此人不能下
此毒手也至期張彤舉旗數揮漢從營中
躍馬直上負利刀挾標槍環遶三市怒目
裂眦大喝一聲擲標槍竟刺徐撫院胷間
殞地漢下馬舉刀斫殺已又殺駱副使已
又殺李副使已又殺洪同知頃刻之內曾
無停手賊敗後獲有漢報功奏揭一件是
爲的據每領兵出掠漢必躍馬爲衆兵先

有參差其行者漢卽挽馬首立斬以是人
皆股慄所至郡邑無不披靡後爲官兵所
獲監軍道問其有何異能漢對曰我惟馬
上長槍一枝短刀一把縱轡向前一氣可
殺五十人不殺五十人不快也其兇暴慘
酷誠如所言此一犯也寸斬碎磔猶不足
以盡辜惜其不食而死僅以首解耳

一逆酋僞相一名

何若海年四十五歲遵義縣學廩膳生員先

年潛入北京以賣篆刻爲生曾蒙吏部咨
送兵部授守備職銜用之不聽雄心落魄
後見東事孔亟屢赴各衙門條陳未蒙見
採適奢酋差楊衆等報兵援遼不許若海
受銀七十兩爲具本稱秦氏女流尚能報
效豈鬚眉丈夫反不如之因許援遼又爲
奢酋差役借用盤費千餘金遂乘催調之
差前往永寧投奢寅父子條上三策謀圖
大事逆賊從其下策令樊龍等反據重慶

奢寅與朱國恩率兵將瀘州燒劫遂進攻
省城拜若海爲相凡密謀狡計悉其運籌
若海旣被擒嘆曰只緣土兵無紀律致有
今日死卽死耳有如旣不能忠天朝又不
能忠大梁成得甚麼人其銀印係奢寅與
水西烏撒烏蒙東川芒部六司府共鑄篆
文丞相之印惟鎮雄未與六司府仍與之
軟血同盟於龍塲壩授若海爲提督五軍
都督統領御營兵馬大元帥攝行相事經

國大將軍之職有馬有金刀鐵券約世世子孫彼此無負今各土司之暗助苗兵殆不虛焉此逆賊的係奢酋心腹卽寸斬萬磔始足以伸國法而洩神人之憤耳

一賊子四名

樊友邦年三十歲永寧司人樊龍長子生而驍雄有智略性殘忍嘗笑中國寥寥天下英雄惟我輩數人龍之作逆也友邦授僞副總兵職銜獨領賊兵萬餘鎮日操練或

遍巡城內誅殺士民之不肯就降者或四出郊外殺劫士民之饒有貲財者謂之游衍戲局民間少女少婦無不納之帳中有周邦寧之女周氏能琴善聲歌竟強擄之其父與夫莫敢伸言然不獨周氏一人已也一門窮兇父子相濟天厭其惡天羅地網安所逃死乎

樊友臣年二十二歲永寧司人樊龍次子也有勇力爲龍所最愛龍據重慶奢酋授友

臣僞守備於十月十三日同石永高領苗兵二千五百餘名自永寧來援龍得之聲勢益張友臣數引兵出掠張彤之攻劫壁山也友臣爲先鋒乘健馬負大刀行人莫敢睨視有青衿婦楊氏者生有姿色友臣擄爲侍妾五月二十八日克復渝城被官兵擒獲

樊友國年二十一歲永寧司人爲樊龍妾生第三子也龍之據重慶也奢酋遣樊友臣

石永高領兵以至而友臣爲前茅國爲後
勁張彤攻劫壁山友國與俱有青衿女吳
氏者友國擄爲侍妾所掠錢帛最多五月
二十八日官兵入城友國出走土司追之

至佛圖關始拏獲焉

張國用年十九歲永寧司人張彤長子熟嫻
弓馬彤之出入國用帶刀相隨常整戎裝
乘駿馬上下城垣舞劒控弦以示威武軍
中目爲小將軍雖不聞其荼毒狀然係元

卷之四
十四
愍逆子不在常律幸爲官兵所獲法應梟
示以殉

一逆酋心腹謀士領兵賊黨共二十五名

石永高年三十九歲永寧司人爲奢寅頭目
居中用事倚爲心腹天啓元年九月十七
日因酋先遣樊龍張彤統兵重慶假以講
糧爲名戕害官民劫擄倉庫占據府城酋
母安氏差永高帶兵前來重慶撤兵樊龍
張彤不聽永高卽從二賊商量欲圖大舉

提兵萬餘屯劄佛圖關拒我王師一面分
兵燒劫沿鄉人戶擄掠婦女財物五月內
官兵破關攻城擒獲梟斬猶不盡辜

胡文榮年四十歲永寧宣撫司生員卽樊龍
親家龍之領兵至重慶也運籌帷幄文榮
之謀居多至期歃血誓師文榮實執牛耳
初授巴縣僞知縣不數日以徐應舉知巴
縣事而文榮陞重慶僞知府管糧儲道事
荼毒四民劫掠各縣號令一稟於文榮焉

五月二十八日官兵入城擒獲

周鼎年三十四歲永寧衛廩膳生員頗有機智邊境中翹楚也因科舉不得志遂蓄異謀天啓元年調蘭苗兵援遼鼎卽棄儒同往至重慶府樊龍發難鼎與謀焉授僞重慶府知府天啓二年正月奉樊龍差解銀三千兩赴省城接濟奢寅行至合江遇寅父子敗回又聞樊龍困於重慶加授僞招討節度使領兵七千救重慶不利回至合

江地名大田溝五月二十一日官兵擒獲
梟磔何辭

王光宗年五十歲永寧衛人曾業儒不就去
而爲吏爲人有智謀料事多奇中早從張
彬游結兄弟盟彤旣與樊龍其爲逆遂薦
之於龍龍與語大異之曰此我輩人授以
僞叅政使爲監軍紀功督餉道彤每有發
動必密召宗與議宗嘗勸龍曰將軍必欲
成大事請勿妄殺一人勿妄取民間一草

一木開誠布公居仁由義召四方異人而
尊禮之萬一事不成猶可自免龍不能從
宗遂依阿曲徇以悅其意因而勸龍僭稱
王號謹守巖城賊中兵將多敬而憚之監
軍道遣人入城用計擒縛後有言其爲賊
腹心全係主謀者有言其力禁妄殺全活
萬命者但僞職崇隆爲謀不小在賊則爲
功之首在漢則爲罪之魁矣凌磔不枉

梅占魁後更名占國年四十歲永寧司人卽

梅寵姪也永寧人呼爲崖上大爺魁爲樊龍千總頤指如意最親信十月初一初五等日隨其叔梅寵攻打大足縣殺死主簿張志譽典史宋應臯縣官家丁馬企龍等十餘人及高知縣率兵追殺魁急走由永川進府城龍使把守南紀門官兵旣入城魁始就縛此一犯者殺二縣佐屠戮百姓事最慘梟磔猶有餘辜

徐應舉年三十五歲瀘州民爲人智巧多機

謀在諸賊中爲錚錚曾爲吏久之厭刀筆
吏無所短長去而投逆寅大見親幸及從
樊龍張彤首事重慶遂僭授巴縣僞知縣
威力虔劉殺人如草一縣人皆懼伏莫敢
睨視賊嘉其功陞本府僞同知復改陞僞
監軍道應舉瀘州民非永寧人比也而又
曾爲吏知法而蔑法乃至於此卽凌礫其
何說之辭

傅文進年五十歲重慶府巴縣民素精醫院

司道府多用其藥餌今被賊害徐撫院及
孫駱二監司章知府各官皆以取用藥餌
故優待之孰知其人外貌恭謹中實狼戾
徐撫院之遇害也其家人徐二者挾印走
匿其家乃密遣人綁縛徐二併其印獻於
樊龍龍大喜授以守備職銜使領兵事黃
蓋金圍呵騶載道儼然於車上儼矣十月
內張彤約樊龍出走傅文進曰不可此地
有長江二道勝於百萬雄兵願千歲就此

建都無他往二賊復止後見天兵四集不
無怨望而以其獻印功大欲殺之輒中止
城中鄉紳饒有家貲者賊無不撻掠文進
之指使居多焉城未下之先三日文進出
城欲逃被官兵擒獲

陳堯峰年三十五歲永寧衛軍堯峰生而螻
鷃與張彤交好久出入嘗與俱彤旣反授
堯峰重慶府僞通判帶管糧餉諸務縉紳
饒有貲者無不恣其擄掠性最淫掠良人

妻女最多有妓曰素娥者姿態傑出堯峰
聞而掠之備極淫穢城旣下之次日始擒
而解之

黃高年三十歲太平長官司應襲與樊龍往
來久結兄弟盟龍旣反授高僞遊擊使領
苗兵把守佛圖關四月二十四日官兵旣
拔關高走入城龍復使守臨江門晝夜爲
盡力不少懈取城中婦女爲侍妾望之如
雲有周應俸女周氏頗俊慧竟掠之爲妻

官兵入城高出走朝天門尋爲土兵所獲
李齊民年四十歲重慶府巴縣人爲人兇悍
旣投樊龍見用日益親信授僞守備職銜
領有旗令沿戶派兵專守千斯門每遇官
兵近前攻戰卽東西竭蹶喝衆登陴發矢
下石不遺餘力梟斬始有餘辜

熊長庚年五十歲江西瑞州人以援遼同何
若海等入川調兵爲奢寅預謀於上年八
月內先到重慶府黃葛渡觀音堂窺探地

利帖拜府縣自稱太祖七世後楚藩朱叔
鰲頓首巴縣快手黃民春送帖認的及九
月旣反長庚授僞總兵都督府銜擡八轎
管梅賊兵三百督戰衆目其睹矧其假稱
王孫密窺於先而僞受總兵協謀於後助
逆黨姦狡謀詭秘擬以梟斬猶有餘辜

陳君寵年四十二歲永寧司人素爲張彤用
事彤旣反授君寵僞遊擊爲中軍旗鼓官
凡彤刀槍劒戟二十八宿等旗皆君寵所

製守備指揮千把總等官皆君寵所管押
嘗與彤分路出兵彤或出朝天門則君寵
出南紀門彤或出南紀門則君寵出朝天
門出各門如之凡民間俊秀子弟皆取爲
門子姿色婦女皆取爲婢妾城破之日寵
逃至長壽縣追而擒之

丁汝登年五十歲永寧衛生員初工舉子業
旣不得志輒鬱鬱感慨因周鼎爲介紹而
見之於奢寅寅亦優禮遇之後鼎與樊龍

自重慶發難寅遂授以僞守備職銜撥送周鼎管中軍事發謀決策知無不言言無不用蓋姦人之雄而逆賊之魁也

周冕年二十三歲永寧衛人卽周鼎胞弟也冕與鼎俱以小有才爲樊龍親愛用事久重慶之變冕與梅寵俱從永寧領兵入城龍得之若增一手足云其攻打榮昌銅梁安岳大足永川諸縣冕無不與俱所擄掠錢穀子女最多重慶旣復冕遁去山谷中

至六月初七日始就縛

羅金祥年六十歲永寧司外四里民幼曾業
儒不就去而習武技藝頗優逆寅素識其
人令隨樊龍至重慶龍既反金祥卽授重
慶府僞推官理刑名事僭理詞訟且稽覈
諸目之勇怯勤怠而殿最之一縣士民望
而森凜有毳衣如璫之風矣

伍就湯卽徐國泰年五十歲成都府新都縣
人曾廩於庠後爲蜀府典簿罷官家居與

張彤交好從之重慶彤反授湯爲中書一切僞檄誥勅半出其手湯之與彤畫策也屏左右最秘密人莫有知之者監軍道聞而遣人以帖諭之答一稟啓視之乃擬楚歌一篇也且曰但使官兵城外歌此賊兵自散監軍道批其後云汝有此手筆上之不能殺賊立功次之不能開門獻城又次之不能暗行內應而僅以一楚歌希圖免死誰其原之次日辰時徑赴該道投降此

一犯也雖後此之投降可原而前此之秘謀可恨觀其更改姓名蹤跡詭秘其爲姦人之雄可知

馬道年四十五歲陝西涇陽縣民先是從故黃總兵標下爲把總重慶之亂道不能脫身因委身張彤而事之加授僞守備職銜使領兵千餘把守朝天門一路嘗乘間引兵郊外大肆劫掠婦女錢穀雞豚狗彘無不括而持去者縉紳大戶編戶革門無不

到而撻求者事急投各道鎮各道鎮方欲
畱以招降而百姓見之爭批其頰歷數其
劫掠狀卒擒縛之

董三策年四十五歲南直隸上元縣民先是
客寓重慶以發賣青布爲業後見樊龍猖
獷暫投效用與以保身久之遂竭知盡慮
甘心爲之股肱徑授巴縣僞縣丞料理縣
事一縣士民惟其魚肉官兵入城首擒始
之與以保身者豈非竟以殺身乎

周汝林年七十歲永寧衛人卽周鼎之父曾
爲生員以年老告給衣巾鼎旣爲奢寅尊
禮汝林號稱太公優禮而不臣後從其子
至重慶爲叅謀汝林老若可從末減然不
能以義制其子反身教之貳焉老而不死
是爲賊其汝林之謂乎

任嘉言年三十歲重慶府巴縣人善演禽奇
門推測前任道府曾有字扁旌賞之樊賊
據城之後本犯以術數見因而信用之每

出征必召而問其吉凶本犯悉與確查某
日宜某日不宜官兵擒獲之日合郡士民
無不爭批其頰此一犯也雖僅以術數見
用然代賊籌策加通賊從賊一等矣

傅楫年四十五歲江西南昌府人重慶書賈
也略識文義樊龍反逆先走投見之意止
於與免性命久之任用授偽把總職銜遂
領排門民兵把守千斯門每遇官兵攻戰
既不能開門倒戈又不能出降歸順乃爲

之布置而綜理焉夫楫旣略識文義矣何悖逆不悟乃爾耶

王堂年二十四歲南溪縣人永寧寄籍卽王國重之子也先同父各領樊龍募兵銀兩從龍援遼及龍於重慶旣反而堂父子則授僞旗牌官俱黨助樊龍殺人放火無所不至五月二十八日官兵入城尚執迷不悟旋爲官兵所縛也一門濟惡父子爲姦惟是王國重解途溺斃未正典刑堂擬梟

斬允當厥辜

郭鼎鉉年四十歲仁懷縣人曾爲生員因奢
寘造逆僞授鼎鉉僞總兵職銜領兵一千
同占據仁懷助逆爲虐朋惡作姦肆無避
忌彼合江賊敗仁懷逆賊一齊潰走遂被
擒獲得非天厭其惡而不使賊徒漏網耶
王元臣年三十一歲浙江人向以包買皇木
久寄居重慶上年樊龍造反元臣遂投龍
爲羽翼查點排門兵爲之守牆又隨從樊

龍口報富室慘害多家劫掠無厭助賊有
據梟斬何疑

廖盛卽羅朝明年三十五歲永寧司人因奢
寅造逆殘破州縣寅初授廖盛爲合江縣
僞典史後陞僞副總兵因投降於羅乾象
請漢劄守備銜被朱國恩連劄拘送奢寅
將廖盛殺死本犯的名羅朝明係廖盛家
人爲官兵擒獲天啓二年九月十五日具
題奉聖旨兵部知道

加銜調補殘憊縣令疏

題爲酌議調補殘憊要地縣令以資戎馬以奠地方事
據布政司呈奉臣紙牌查得仁懷正官久缺民心無主
時爲狡賊蹂躪合江係進兵討賊正路縣官行取離任
無專官應酬料理仰司卽於合屬揀選才幹者酌議就
近調補料理兵糧撫輯殘民保固疆土等因奉此該本
司署印副使戴燦查看得合江係水陸之衝仁懷爲川
貴要路目今戎馬交馳兵食拮据急賴縣官經理查得
雙流縣知縣劉鼎新粹履輝山拱壁英猷出匣太阿才

裕折衝力肩鴻鉅奢酋到地方本官率兵拒敵保全城
社威名大著歷俸已逾二年應加陞同知寄銜叙州府
管合江縣事石泉縣知縣商良弼拊民清勤政最援省
勞苦功高文武全才經綸偉器成都之國本官督兵入
援躬冒矢石擒斬甚多歷俸近二年應加陞遵義府同
知管仁懷縣事不惟要地有得人之效而各官駕輕就
熟計無便於此者請乞會題等因到臣該臣會同巡按
四川監察御史張論議照合江仁懷二縣皆與永寧接
壤逆賊發難首被虔劉室廬盡皆殘燬流移罕有復業

自非才情超朗膽勇俱備者決不能當此危險卽今兵
集掃穴寔爲必由之路拮据糧運應酬軍機尤貴得人
查得雙流縣知縣劉鼎新石泉縣知縣商良弼各抱瑋
才兼長武事自經酋變鼎新督領鄉兵屢與賊鬪良弼
親提義旅來援省圍皆見之行事非虛揣者以之調補
不獨整敝起殘兼可督兵理餉但二官歷俸頗深夙著
功苦各加陞同知職銜不逾格例旣經該司酌議前來
理合具題伏乞勅下吏部再加酌議將劉鼎新加陞叙
州府同知管合江縣事商良弼加陞遵義府同知管仁

懷縣事覆請行臣等轉行各官遵照任事遺下雙流石
泉員缺卽以新銓合江仁懷知縣改補嚴限赴任不但
駕輕就熟且朝移夕到於地方軍旅兩有裨益矣天啓
二年十月十一日具題奉聖旨吏部知道該本部覆將
劉鼎新加叙州府同知管合江商良弼加遵義府同知
管仁懷楊世俊改雙流周蓋臣調石泉各知縣奉聖旨
是

議處不肖有司疏

題爲議處不肖官員以肅吏治事臣頃以逆賊披猖督
兵江上凡各有司目擊小民流離軍旅騷動之狀宜何
如惻隱何如調劑譬諸拯溺救焚汲汲皇皇猶虞不逮
而乃有不務噢咻祗圖剝奪者可一日容之民上乎除
事涉細微姑從冊報部院處分外廉得其穢聲最著者
有三人焉謹會同巡按四川監察御史張論爲皇上陳
之如夾江縣知縣董繼舒性本粗豪事多孟浪理民縱
剝擊之害持躬乏禮義之閑用銀娶部民胡應泰之妻

爲妾乘扮春日溷入後衙官箴謂何寵門子李機入衙
併母周氏喚進姦宿廉耻何在收糧自有天平法馬每
兩重至二錢又以拆封不足罰瓦折價收戶田寅等之
苦堪憐丁口原有底冊籍數旣增仍復取紙每載至瀘
州變價入橐紙民姜倫等之口難掩私訪奉旨禁革乃
敢指訪濫罰致戴廸等膏血無遺醫生止供藥餌輒聽
匿名拏考若艾選等誅求最慘鎖冊書趙合稱飛說是
矣而嚇楠木百餘仍罰銀十兩是則何名用訪蠹汪諫
爲主文已謬矣而任包當納吏下鄉攫噬人孰能堪黎

達衙虎也嚇財妄告姦情何遂將陳應詔李思選斃之
枷下陳應積書也挾私妄報大戶何遂坐犯人王思商
家刑詆科罰最可恨者京債逼迫貸僧因準因羅不遂
而生事拷斃致令永述典屢告不休其他生事濫罰鑿
鑿有據此一臣者初政似覺可觀得薦遂爾改節邪淫
貪暴無不備具應照貪例革職爲民榮昌縣知縣今丁
憂張縉濟變無術潛身有方居官線索由人臨民怨謗
多口樊茵發難本官先將家口送入陳九傳家已昧效
死之誼及百姓擁衆打死賊黨張元等捏作已功申報

將誰欺乎衙役陳嘉猷等七人號七知縣與之對坐飲酒禮以上賓官箴爲之掃地投賊陳九儀等多人俱受僞職令各納銀百兩槩從寬政孔方真可通神從賊張貴先等既經梟首變其妻孥復擇其有姿者六口進衙何免於宣淫之議秦兵經過每糧二十石取馬一匹及其不用而每匹追價四兩五錢入已曾不顧椎吸之慘甚至有稱熊賊坐縣本官密托生員王應正與酋交通給以印票應正乘機抄劫地方鄉兵拏獲送至寺中投見捏解展轉一月賣放以滅口證迄今未獲者且本官

籍住永寧雖曰聞訃竟不知何所歸著此一臣者智識
昏暗舉動貪婪衙役待爲上賓已無羞惡之念民謠俱
云翻轉足似作用之乖臣前疏查叅未結姑應照不謹
例閑住丹稜縣知縣葉日新父子爲政上下皆官法律
不束於居常公私借飽於囊箠到任取庫銀五百兩填
還京債鎖拏收頭王中秉等無端夾打逼令代賠是以
公庭開騙局也發男之榜換金雅州歐死樂戶致州收
監本官將銀一百五十兩前去買和是以錢神抵人命
也庫吏吳仕文等營幹帶辦每名索銀十五兩孫可先

等過送可憑抽兵銀自應起解聽子收衙以衣服筭抵吳仕文等經手可證生員熊繼周赴考溺死何罪之有而聽寵吏胡一達之唆責其扛屍進城索伊父熊可中二十兩之賄遂爾暗銷故民李二妻劉氏不從伊子之姦宜責其子而聽腹臯曾大仁之計連發數票拘拏非後夫張尚知二十金之賄安得住提防守何事而民兵每名縱子索銀五錢方給工食公堂何地而庫吏袁子達縱子兇毆幾死大駭觀聽此一臣者才識昏庸事權旁落內外全無防範表裏肆其姦兇卽褫綬投荒僅可

謝其往過但念心地本實歷任甚淺應照不及例重加
降處伏乞勅下吏部再加查訪覆議上請如臣等所言
不謬將董繼舒革職爲民張縉冠帶閑住葉日新重加
降調內除榮昌張縉已經推補有人其夾江丹稜二縣
遺下員缺卽行銓補勒限前來任事庶墨吏知懲而殘
民獲甦矣天啓二年十月十一日具題奉聖旨吏部知
道該本部覆奉聖旨是

塘報蘭賊出沒截殺情形

爲塘報苗情事九月二十二日據防守長寧路加銜副總范繼道塘報據前營張之麟報稱賊將拖船凹營房盡燒辰時卽至黃沙坎頃刻立成七營又據蘿卜坎左營冷正榮報賊於二十日與西關交戰不意馬湖營兵染病奔潰繼道手戮二人以殉賊勢漫出各兵退守隨傳令各營擇險據守苗兵焚燒洞底銃擊賊首一名打死二名賊不敢渡聲言去建武回來定要找廂攻洗一擁而退又據本官塘報密以小帖藏于髮中潛進賊地

令凌霄城伏兵鄭國禎等掩賊之後賊若小隊不可輕動大隊一至聽號殺出隨據塘報張龍回報賊知高琪官兵埋伏建武有備盛傳官兵用調虎離山之計要從後面搗巢且聞汀門兵已大進連夜撤移及賊攻葛守備營半日計點官兵殺死賊兵數多又有安家弟子五百亦被殺死稱美不已葛盛德陣亡折去官兵百餘監軍道劉僉事塘報相同又據納谿路叅軍劉養鯤塘報遵令於本月二十日暮親率張令何正光秦國倬等奇兵連夜直搗宋江橋時賊不及甲馬不及鞍被官兵一

衝拔營逃走張令秦國偉連殺四人係總兵楊選親舅
柳二千總何啓孟百總阿定張二拏獲僞坐營都司王
應伏一時兵士奮勇殺賊百餘奪戰馬六匹槍十四枝
俘獲僞總兵楊選妻女七口酋妻馬氏擁衆逃入水流
崖洞寨去訖又燒燬江門穴江賊營二處上期捉其酋
妻馬氏不意逃走隨卽收兵請乞量犒鼓舞又據本官
塘報官兵深入永城前後盜出船二十餘隻接出原任
松潘道李叅政子一人吏一人又於蠻洞子拏獲苗賊
五名婦女一口見解道審落洞崖拏獲奸細尹顯能等

二名槍弩關刀六件又據本官報稱苗知宋江敗歸崇明率衆自長寧來援奢寅率衆自夾子口來援勢甚猖獗本路旣已救韓走魏則長寧仁懷二路又當速入以分賊勢又據加銜副總鄧懋官塘報賊已盡剗二羅口去納三十里又據江安縣申報賊已漫出直窺縣城又據劉養鯤塘報賊欲報復前恨率兵大出劉村雷村是村燒殺各三層岩上岩下將趙志上家口船隻圍殺去訖小苗自仁懷回剗兵十三營老苗自長寧回剗營甚多合兵要衝納谿江安又言懸賞銀一千兩要捉劉養

鯢遍地燒劫勢甚猖狂叙瀘道塘報相同又據仁合路
加銜副將羅乾象塘報逆賊奢寅率衆窺仁懷試我虛
實越同知與乾象薛來衍張鍾秀等各率勁卒共六千
分頭堵截又令王繼先把小關洪綱守濫壩王繼先伏
兵于松盤衝殺斬級一十八顆奪獲男婦三口解驗洪
綱兵士內變一時義兵賊兵混殺無數賊遂潰敗退回
洪綱見與王繼先等合營又聞江門兵進酋勢甚迫兵
聲頗振續據越同知塘報相同本月初十日又據鎮雄
貢生王信稟報奉令撫安鎮雄轉諭烏撒安效良不許

助逆有挽回求全之機貴州官兵戰勝社輝悔怨諸目
又聞小酋賊於夾子口損兵甚多又據分守川東道吳
叅政報稱據守備楊通霑報九月十五日忽賊衆前來
清水逐趕人民卑職督同守備楊國纘等率兵追至彼
中交鋒斬級四顆賊退周水割十四營至二更時分官
兵四路舉火鳴銃大呼殺人綏陽兵到接應賊俱奔潰
由金刀坑散漫而去我兵折轉入遵義城搽賊盡逃惟
是楊栢一營與西酋逼近兵無糧以資守本道隨令署
府綏陽任知縣同將領官兵防禦城池地方各等情到

職看得逆賊自分必死乘間衝突雖官兵沿路剗定而窮寇狂逞其鋒甚銳兼之霖雨不止軍中大疫師老財匱支持寔難除防禦策應隨處料理外但大將與京師未至楚中兌餉四十五萬未解入川酋之衝突未已建之苗患復騰爲可慮也天啓二年十月十一日塘報兵部

塘報馬之良出犯地方

爲塘報地方苗情事本年十月初九日據分守上川南
道叅政陳龍光文報據雅州申准雅黎遊擊李毓華報
稱土官馬之良藉口以東元服色輒敢調集猓苗聲言
攻圍城堡此等不軌之謀是假此釁端而與奢賊爲之
內應也叛形已彰爲害匪小等情又據榮經縣申同前
事據大渡河所關稱改土苗民東元三哈殺賊獻功蒙
加服色三哈唆土婦馬之良聲說東元係他家生如何
受服色爲名起兵燒劫具由申報訖今照馬之良復行

起兵前來挾要東元鴛掬不聽處分聲言動起番猱卽欲叛反又據馬之良稟稱東元父子謀占卑司地方截管爵土奪掌權職將上下地方付他管理又將良撫司置管何地皆閭存義王良臣等暗地替闖撥置引誘故惡如此吞害仇不共天如同謀幹事相助銀兩設計漏放東元父子出相嶺死不甘休今卑職略點家丁前去著落上七枝耆宿三哈脚孟鉄鉄等隨領小後生前來北關外五里波各路口分布把截相嶺擒剿二惡乞將二犯縊死發出如前惡一日不出定要與店家閭存義

王良臣等名下跟要分令人馬到各宅上坐催一日不出供應一日速將二惡押出卽撤兵回萬事休矣等情又據呈稱懇將二惡擒拏發出庶免地方擾攘上下得安四十八寨生番觀望不致欺玩若護留隱匿必復動干戈萬無休息又據上上二營提調百戶馬象乾胡觀宸報馬之良動兵奉本府差三家通把前抵土官不容面見又據苗人脚撒口稱土官差耆苗阿息腊元四狗脚撒等執令督率各苗前至大田壩住劄初四日土官親抵大田挾要東元父子若不具報干係地方等情又

據楊四營百總毛國元稟報查得土官於二十二日令
人手執鷄毛前往黑麻溪擢凹小水調取兵馬二十五
日令那衣執火柴頭上綁鷄毛令野馬他寅夜進大小
三冲各寨調番其各山并白崖水尾紫竹地已調發上
來白聘簡朱慎藍友枝吳應舉俱到途中土官叫人阻
住不容進見又接本官心腹書識黃袍藍之興私信事
已行他二人亦拚性命無及觀此信酋實有乘東元之
由叛亂但調諸寨西番各鄉難當抄劫之害及查撥弄
者乃奢崇明有八個人在彼隨住有一頭目甚是可惡

全憑此人行事又據塘報楊文元報稱查得土官惡差苗人冷酒別前來各處百姓家催夫馬准於十月初四日上來有苗人陸續上來不知住於何地又黃藍私信傳言事已露出實難勸阻准發兵於大田衙門劄下只要東元父子出來等情該吳知州查得馬之良藉口東元輒敢調集苗猺聲言攻圍城堡不軌之謀假此而與奢賊內應又該遊擊李毓華查得先年瞿馬二土官爭襲構殺院司議定上七枝卽東元三哈等改土歸所當差立馬之良管理地方堂弟馬呷什隨同協管東元係

之良家生改土後不屬之良管轄近相嶺苗猥出沒東元等殺賊來獻保安道路爲議給大帽衣撒千總劄付百總王良臣生事挑撥傳先聲擅送黃傘東元恃悍通要約束諸苗已將東元父子并王良臣傳先聲等羈候一面撫諭之良靜聽處分各等情到道轉報到職卷查先據建昌上南二道報稱奢酋每以奸細扮作僧商入建挑撥岳母馬之良引番出犯彼此起兵又入松潘挑誘火落赤犯邊與江門長建各路偵探逆賊又發頭目山人高萬古等帶兵三千由烏鎮透膩乃入建約馬之

良起兵犯省犯叙各情已經四下申飭嚴拿把截隄備
及諭之良大義滅親母令交通凡有奸細許拿解出事
完另行題叙優擢外今據前因除行令道將整飭隄防
將東元等犯解赴按察司查審正法差人化諭馬之良
撤回番徠靜聽處分嚴查挑釁員役及將朝廷威福與
逆酋造捏假旨詐言搖惑土司附和情弊丁寧曉諭及
促陳叅政移駐雅州與建昌道李遊擊互相鎖服隨宜
安撫飭兵防禦外但川中無將無餉楚帑不至人心張
皇藺賊未平邊釁復起襟掣肘露事可寒心干係地方

苗情合行塘報天啓二年十月十一日塘報兵部

揭報就近陞補司道

爲揭報缺員就近陞補以濟時艱事省直藩臬二司統
理錢穀主持法紀屏翰彈壓最不可缺之官也守巡兵
道領事一方尤難乏人况大憝未縛羽檄紛馳當民窮
帑盡之時爲措餉籌兵之計必在官無缺員事有專局
綱舉目張庶克有濟今四川布政司左布政使周著自
經論劾回籍日久雖見查勘斷難望其再來右布政使
林宰在外總餉自難卸擔守西道副使戴燦身兼數印
東奔西馳按察司按察使王佐才已經題留懸缺未補

蜀固不辰豈可遐棄近者本部酌定邊才俱於本省自有司至監司院皆得就近陞補今就近移補無如林右布政使陞左建昌道按察使諸允脩陞補右布政使守上南道叅政陳龍光陞補按察使分巡下川南道叅政王世仁陞補守上南按察使叙瀘道副使李仙品陞補分巡下川南道叅政分巡上川南道副使趙日亨陞補建昌道叅政守西道副使戴燦陞補分巡上川南道叅政一轉移間局面旣專事難推諉藉以應酬兵馬催趨錢穀實爲目前便計以上各官資俸相應才品俱懋伏

望本部俯念遐方多難就近推用遺下守西叙瀘二缺
卽於本省隣省附近量材推補刻期到任裨濟時艱造
就地方不淺矣天啓二年十月十一日揭報吏部

咨設旗鼓中軍

爲遵旨改設欽依旗鼓中軍等官以疏武科事准兵部
咨先該兵科都給事中蔡思充題該本部覆奉欽依通
行查議但武科一途原與文闡竝重近因人多缺少遂
使用舍殊途升沉互異以致人差齟落且謂法未衡平
臣部查得督撫鎮道戶部旗鼓中軍等官或任傳宣或
司軍旅其大者足當一面之任小者亦綰半通之綸固
猶愈於策空名而無實用者也向來不由部推使雜流
納級等項皆得占據其間夫旁門不塞正途安通變而

通之誠當改設欽依自後應將前項各官除見在管事
世職武科資薦相應者聽臣部推陞外其餘雜流納級
槩不許用凡遇員缺悉聽臣部將武科推補或聽督撫
咨補俱照欽依守備體統行事及小把總職銜舉劾黜
陟亦照常舉行則竊據者難爲營窟之圖需次者可免
河清之嘆此誠疏通武舉之一策所當申飭舉行者也
再照前項欽依或於地方有宜有不宜其宜改者臣部
開載未盡聽督撫開缺報部其不宜改者俟本官陞轉
後卽聽裁革以省冗費等因題奉聖旨是欽此備咨到

職查得蜀中僻居西南三面隣苗居常無事中軍已不可缺况值蘭酋造逆兵巡等官無不籌兵理餉奔走軍中尤在需人以武舉授欽依守備料理旗鼓中軍人可疏通事可責效就而黜陟斷在宜行但川中向以世職料理兼因援遼討蘭填給部劄加銜充理不爲乏人卽職衙門旗鼓李必茂係成都右衛世襲指揮僉事前撫加銜守備自圍城拮据料理業已年餘相應酌定世職加銜照舊料理但請本部俯照註開一併題奉欽依各頒劄付以便填造賢否得示黜陟至於懸缺卽請推補

勒限赴任統乞行職衙門遵照自後年終填註賢否事實報部查考理合開註回覆爲此合咨本部煩賜查明具題施行

計開

四川巡撫衙門旗鼓成都右衛指揮僉事加衙守備今請照例授欽依守備管旗鼓事李必茂兵巡川西道中軍寧川衛百戶三科武舉部科咨送松潘坐營征建題加本衛指揮僉書督兵援遼加衙守備王國臣

松潘兵備道中軍松潘衛左所百戶奉例加納
本衛指揮僉事透圍援省加銜守備張應甲

建昌兵糧中軍鎮西千戶所應襲百戶征建咨
部加銜本所指揮僉事援省加銜守備魏民望
安綿兵備道中軍保寧所富村驛百戶加銜指
揮僉事王昌明

分巡川北道中軍陝西秦州衛中所百戶部劄
加銜守備夏才

以上六員請乞本部具題以守備職銜頒劄

料理註定衙門旗鼓中軍事務內王昌明夏才身親戰陣兩入賊穴立功已多亦宜破格以守備行事

威茂兵備道中軍

叙瀘兵備道中軍

遵義兵備道中軍

兵巡上川東道中軍

兵巡下川東道中軍

分巡上川南道中軍

分巡下川南道中軍

以上請本部推補監軍道中軍請本部一同
增補

天啓二年十月十一日咨兵部該本部題將李必茂照
例以都指揮體統行事以守備職銜管四川巡撫旗鼓
事王國臣照例以都指揮體統行事以守備職銜管四
川兵巡川西道中軍事張應甲照例以都指揮體統行
事以守備職銜管四川松潘道中軍事魏民望照例以
都指揮體統行事以守備職銜管四川建昌兵糧道中

軍事王昌明照例以都指揮體統行事以守備職銜管
四川安綿道中軍事夏才量陞署指揮僉事照例以都
指揮體統行事以守備職銜管四川分巡川北道守軍
事各給劄定限赴任奉聖旨是

咨葉達枝補寧越守備

爲咨補緊要守備官員以衛地方以服邊苗事寧番越
雋屈在雅黎大渡之間苗獠環列睥睨跳梁業已屢見
此猶其流毒道路志在財帛而已獨土婦馬之良女嫁
逆賊奢崇明爲妾初則遣人交通在之良忠貞不移道
將亦爲駕馭然而部衆已眈眈思逞矣近者官兵四面
圍藺酋復以山人頭目高萬古阿三等率三千人持書
禮走芒部透馬鎮膩乃以達之良起兵雖曾檄烏鎮阻
截而令建中道將撫慰其道路之廣犬羊之性能保其

不交通不陰陽應對觀望生事者乎寧越守備實其地
方專官今守備馬繩祖以鄉官員外胡繼升家被焚掠
奉旨行究見在提問了結之期不可指計而馬氏家奴
東元又以服色細故爭競日日點兵秣馬不知意欲何
爲此一官者時不可缺查得軍中立功涿鹿衛指揮僉
事葉達枝料敵如在目中折衝不難馳驟勞苦年深酬
勸宜蚤以之陞補寧越捍衛邊土撫馭土苗才地相宜
理合咨請本部俯念衝邊多事將本官題補前項守備
員缺立限赴任庶要地不致缺人苗患得以廢塞地方

俾益不淺天啓二年十月十一日咨兵部該本部題將
葉達枝照例以都指揮體統行事守備寧越地方事務
奉聖旨是

京察自陳疏

奏爲自陳不職乞賜褫斥以安愚分事臣見年五十五歲浙江紹興府山陰縣人由進士歷官評事寺正知府洊陞監司至四川左布政使天啓元年十一月內陞授今職今天啓三年正月當考察之期例得自陳伏念臣燮元學識淺陋材力疎庸報國徒有血誠歷任曾無善狀矧茲多難益用不支赤白之羽紛馳經年未能蕩剪公私之藏交匱到處皆起哀鳴責跛蹇而馳驅徒見屢蹶與朽枯以撐柱寔慮速傾時已至而漸衰寵雖深而

知足疆場爲大豈堪尸位以虛糜高厚難欺輒敢披裏而上告以臣罪戾伏法自甘得荷矜全褫職爲幸伏望皇上軫念蜀方多事督撫需材照例准臣致仕勅下部院另揀才望前來接理施行天啓二年十一月二十四日具奏奉聖旨朱熒元督理軍務著益展猷爲以副委任不准辭吏部知道

加陞府佐疏

題爲酌議府官加陞以重事權以收全效事
蘭賊造逆十倍於楊苗卽今勢雖窮蹙其志彌狂東西焚劫曾無寧晷各有司中慷慨任事者固不乏人而中有勤勞最著若不量爲陞擢無以示勸曩者賊初據重慶而犯成都推官胡平表重蘭狂奔調出石砭之兵一戰於張關再戰於江北無不搴旗斬將及奉臣密檄援省取渝復縣奪關動有勝筭無不收其全捷同知趙其杰當人心渙散之際毅然爭先獨收勁卒以取渝城斬馘功多衝

鋒最苦方周鼎以二萬人來援本官先以調發瀘州乃
廻兵奮擊遂建首功同知段師文當成都被圍水泄不
通之日親提四千之衆殺入重圍逆賊莫敢攖其鋒軍
士因而生色及戰守南城自負挨牌執刀身先殺賊今
在沙河獨鯁狂鋒此三官者一片真心滿腔偉略臨陣
不辭矢石運籌具識險夸至一切鼓舞招徠俱中窾綮
目今分布討賊尤樹奇績及查先年征播推官高折枝
身先戎馬當桑木關一路議加僉事以重事權而酬其
效如三臣者不但驅以領兵先掃蘭州巢穴卽異日將

責令勒得勝之師徑道突出夾攻水西若不重之職銜
何以隆事權而責成效謹會同巡按四川監察御史張
論合詞以請伏乞皇上軫念西南賊氛未靖急需文事
武備之臣以濟厥事勅下該部照高折枝例將同知越
其杰段師文推官胡平表俱加按察司僉事職銜令其
各率勁兵段師文胡平表由瀘衛直搗永寧越其杰由
馬克橋直搗紅崖大囤兩地止相隔十里卽令會合大
兵齊掃古蘭早奏膚功奠安西土蕩平之日仍聽臣檄
令各揀勒精兵二萬三路直出湄潭掩水西之後而會

偏沅之師衝殺其前再約黔省出奇從中其擊使其腹
背受敵不難撲滅矣天啓二年十一月二十四日具題
奉聖旨吏部知道

請催兌解楚帑疏

題爲賊勢披猖不已兌帑解發無期懇乞聖斷以解倒懸事蜀自蘭酋造難四盡三空庫藏先竭於調援新糧已寬其一載而一切防邊養軍之費毫不可少天不雨粟石難點金臣與督臣按臣以及三川縉紳諸臣無不叩閭來帑以濟然睂蒙皇上眷顧西土前後允發帑金與戶部咨兌者共九十五萬兩於時臣與三川士民額手歡呼謂有糧則有兵滅賊易易矣除前後解到者督臣開單報部已明外尚有兌解湖廣遼餉共計四十五

萬兩督臣援黔東下移咨開送到臣內云業已數催未解聽臣徑移文差人催用又一咨云奉旨內將解蜀二十萬兩通融黔蜀支用臣以藺寇不與播酋同播酋守穴以抗王師或可遷延年月藺賊時時出柙肆其狂饒路險隘多隨處當防不爲暫勞永逸之圖必虧九仞一簣之力隨拜疏再請發帑及全留通融二十萬之帑與蜀支用遂鱗次差人催取楚帑一面調集漢土官兵約至十有五萬屈指計筭楚帑四十五萬可供此十五萬兵三月糧餉俟大將一到剋期討賊近接湖廣布政司

公文內云戶部節次兌抵俱稱新餉而新餉卽在半蜀之中非另有別項錢糧也又云奉旨蜀黔通融益不知適從除嚴催各屬星夜完解到司轉解期湊足半蜀及兌抵通融之數又手劄內云節次兌抵此兌抵之銀卽在中分之內非另有錢糧也前署官偶因黔急而蜀緩故解黔稍贏而解蜀稍縮然總會已逾加派正額等語夫兌帑四十五萬明明的數絲毫未解督臣卷案可查通融一說止於二十萬兩內言耳今旣云卽在中分之內又云解蜀稍縮殊不可解楚蜀雖異均皆王土免解

而覓原非額外今屢催而不至此堵截久饑之衆與檄
調將至之兵將令其散回任賊出沒乎抑令其忍饑枵
腹而戰乎楚之徵解不齊必非坐視而蜀之需用甚急
難捱時刻目下庚癸頻呼號令難下萬一脫巾而散賊
必乘之於時責臣以不能駕馭臣亦何逃於三尺卽欲
卸責於楚誰能信之况賊自江門遵義得志之後倏而
闖出長寧建武倏而突犯納谿仁懷欲罷不得欲進寔
難輔車唇齒尋常猶且望濟皇上業布弘恩而蜀竟未
霑實惠臣情亟勢窮安得不仰天而呼也伏乞皇上軫

念西南半壁關係匪細賊正猖狂未已勒兵待餉勢如
倒懸或嚴勅楚中將兌帑四十五萬星馳盡解蜀中或
徑發帑入蜀接濟楚銀仍舊解部餉足兵強庶克有濟
天啓二年十一月二十四日具題奉聖旨着該部作速

議奏

糾叅縣令疏

題爲縣官縱子招兵投餽憲司據實糾叅以肅官常事
據遵義道僉事趙邦清揭稱本道家居已聞綏陽知縣
任寵縱子招兵圖餉本年七月二十三日賊犯遵義任
知縣旣署遵義縣印同男如銜守備任國瓚擁兵衝出
得脫推官馮鳳雛孤身死節至十月初六日本道蒞任
入碁江本官具詳報道批行查究適以水土不服在碁
調理至十七日坐堂任知縣次男任國珣在堂站立袖
出一揭乃害真安楊知州遵義楊主簿文也本道斥之

任國珣復於二十七日公然赴堂遞一公文兵冊討餉
內開贊畫任國珣其餘叅謀中軍旗鼓指揮千百總兵
士共三千三十員名本道閱之不覺驚訝面加詰戒國
珣父作知縣子不得預兵事姑置不究至二十八日本
道坐堂時富順盧知縣綦江鄒知縣叅將侯良柱俱在
堂次任國珣投伊父印信公文一角內有印信紅手本
開送禮銀二十兩夫本道乃綏陽知縣任寵之親臨上
司也明白敢以金餽是本道不足取信於所屬一知縣
本道卽當罷黜除原銀二十兩卽時行票封發綦江縣

貯庫外切照本道家居二十一年以吏部郎中起爲僉
事世味備嘗何敢與人忤矧任寵陝西咸寧縣人本道
陝西真寧縣人地之相去不滿四百里仍有姻親亦何
樂與之忤但任寵與推官同城不顧上司招兵請餉虛
詐不實頗聞剋落縱子招兵侵餉可知家法不嚴子旣
預兵親戚家人狐假尤甚揭害同僚妄認已功公然以
多金餽送親臨上司罪可勝誅本道一生名節遂被汙
蔑若不重加叅處任寵本道定告致仕回籍等情到臣
臣讀之不勝髮指夫新疆三陷幾無子遺措餉徵兵苦

楚萬狀乃知縣任寵以綏陽兼遵義何等責任賊至旣偷生以獨免賊去則縱子以冒餉甚至用印信公文餽賄憲司不法殊甚除行拿任國珣等併究招兵剋餉揭害知州主簿等項事情外該臣會同巡按四川監察御史張論叅照綏陽縣知縣任寵投賄憲司事上全無忌憚縱子射利褻躬殊乏防閑雖其經歲督兵不無支撐之苦而臨難苟免寔爲公論所羞應照不謹例革職閑住者也僉事趙邦清初謁臣於敘府見其意氣慷慨毅然以殺賊爲任及到信地獨持丰采申飭一新相應紀

錄優擢以爲持正之勸再照綏陽當逆賊王倫扶國擢等出沒之區水蘭交衝之路縣官不可一日缺人先是布政司議以桐梓殘破缺官料理將提舉李璵加陞同知職銜管該縣事今綏陽正進兵道路戎馬交馳需人尤急提舉李璵守潔才長雅有吞苗之志理鹺署篆已見其效就應加遵義府同知職銜管綏陽縣事料理軍馬錢糧人地相宜伏乞勅下吏部再加酌議覆請將知縣任寵照不謹例革職閑住任國珣等聽臣拏問發落趙邦清紀錄擢用李璵加銜同知改補綏陽料理遺下

提舉員缺另行銓補行臣轉行遵照庶法紀肅而憲體
清險佞懲而實才效天啓二年十一月二十四日具題
奉聖旨吏部知道該本部覆將任寵冠帶閑住趙邦清
擢用李璵加銜同知管該縣事奉聖旨是

請赦歸死逸囚疏

題爲逸囚歸死革心可憫乞勅部議解網以廣皇仁事
臣惟貪生怖死物之常情有隙可圖何謀不逞况豺狼
橫行之日正狡兔倖脫之時屢據各有司報獄囚破械
斬關而出者不可勝數乃有誼不從賊甘心歸死如簡
州溫江郫縣等邑獄犯黃金王沈憲等或周旋官側執
杖荷戈相向而哭毫無叛意者或挺身效力不畏鋒鏑
躬走賊營偵探消息者或妖黨惑亂約爲內應而堅拒
不從首官撲滅者或取賊旗令與賊營樹皮爲驗以俟

官司查質者臣在圍城得聞是信猶意其偶偷目前之
生旋爲苟免之計而不意圍解賊退此輩自請枷鐐慷
慨就獄所據申報鑿鑿不謬夫覆盆難照逝水不回畫
地爲牢誰不縮步故有一聞賊警卽出妻獻子俛首乞
憐與夫引賊殺掠草菅生命皆不過貪此一生遂冒大
戮而詎意必死之夫獨能奉法出柙之後不忘故園若
各囚所爲亦異矣夫衛官首賊是其功也束身就死是
其忠也功不可掩忠不可棄聞且見者知大辟尚懷報
國棘林不乏義士於以鼓人心之忠憤而揚盛世之休

美所關不細昔貞觀初釋應決之囚八百三年而應期
畢集此猶謂法不可逃有與倖之心以今日較之更有
出於常情之外陛下首登大寶而有此就獄之囚真德
化所致古今奇事也各犯會奉決單罪有差等法當遞
減按臣職掌所係自有定評臣惟反獄從賊之徒未得
盡捕而革心向化之輩不被恩赦何以激勸人心磨礪
治化謹會同巡按四川監察御史張論合詞上請伏望
皇上特勅該部酌加遞減大施寬政議覆上請轉行巡
按御史照例備述各犯情罪與效力就獄緣由造冊奏

聞定奪俾天下後世咸知皇上慧照圓扉仁流解澤堯
天舜日光被無涯天啓二年十一月二十四日具題
奉聖旨這獄囚情可矜恕著從寬議處該部知道該刑
部覆奉聖旨逸囚黃金玉等助力軍前事平歸獄情可
嘉憫都准免死從寬發落

塘報五路情形

爲塘報軍情事本年十一月初三日據長寧路監軍僉事劉可訓報守備王延賓率兵於壘湧寺拏獲奸細一名陳受供係苗目張抹賽差來打聽十四日守備姚化民率兵於上羅計生擒叛賊三名斬功五顆兵士帶傷六人報稱逆賊自長寧西關建武猖獗後知監軍道率兵堅營高縣四下埋伏甚多賊衆自落亥撤營由黑圍長官司小路奔去建武城牆多行掘挖本道卽發兵士馳建武相機追剿本月二十四日又據叅將張邦紘

報千總涂可章本兵於孝兒嘴拏獲奸細二名又據叅將林兆鼎報千總夏永道率兵拏獲奸細一名阿仲又據分理監紀同知段師文報加銜副總范繼道率兵拏獲奸細二名阿三等守備鄭國禎下兵郭明選等拏獲奸細李成和以上俱係逆酋遍布探聽細作陸續擒獲又據劉僉事塘報各隘把截官兵陸續擒斬苗賊十五名賴生擒奸細七名賊欲分道直攻叙府知我兵埋伏遍布一切奸細又俱擒斬於是與本道相持四十八日連夜率衆迤回鎮雄設酒款酋意欲擒獻酋不赴席本

道因遵持重之令務要一舉萬全兵士未集不敢輕動等情十一月初一日據納谿路監軍叅政閔夢得副使李仙品塘報叅軍守備劉養鯤報官兵何正光閔法院興邦等於十月二十五日夜劫倒馬坎逆賊樊虎寨殺賊十三人生擒二人守備王有貴等劫苗目屈丑兒等寨燒營二所生擒一名又據劉養鯤塘報十月十八日趙志上率兵劫沙嶺賊營於沈家灣殺賊十四人傷損者不計生擒真羿子一名阿王永寧衛軍丁一名二十一日加銜叅將胡汝高陳大臣等率兵追賊於毛連牽

對陣生擒賊兵冬兒王小應二名追殺十里跌死甚多
王思恩弩射三人得獲長槍十三枝馬絮五牀長刀二
把弩箭一副守備朱朝聘率兵於和尚石把截生擒賊
兵六人招降旗一面內一人當時身死餘解監軍道訖
守備鄭世臣等率兵於鄧家壩生擒僞小旗馬繼先僞
都司馬騰中馬伶奪回被擄男婦張坤等六十人指揮
胡汝新率兵於火石背截殺生擒僞叅將袁加受軍器
火藥不計擒賊黨二名守備仇三桂率兵於太山廟生
擒二名驍將王繼等率兵於羊高山對敵殺賊十一人

又於牛石灘對敵殺賊馬兵一名奪獲棕衫一領大弩
一張又於花崖口追賊生擒一名又於太山崖追殺賊
兵四人生擒一人又據加銜副總鄧懋官報十一月十
三日逆賊四路來攻我兵奮勇殺賊馬兵一名又據巡
北叙瀟二道報十四日天未明賊衆五路圍營鏖戰至
巳時分斬殺甚多因兵士接戰半日饑餓潰散張令等
自趙壩率兵來援左衝右突兵少不能禦賊官兵奔退
渡江陣亡與泚死多人逆賊焚燒營壘并納谿士民房
屋而退所損士馬與斬獲功次查實另報又據加銜叅

將胡璽虞報率兵援納殺賊七顆胡汝高報率兵援納
蒙二道懸賞渡河殺退逆賊二枝得馬絮五牀盔甲三
副長槍十三枝弩五張斬功十五顆陣亡官兵七名張
令泰國倭報率兵懸賞過江斬殺十三顆獲馬十二匹
與賊對罵當將朝廷威福陣上傳諭黨賊自散酋亦撤
退陣亡兵十三名加銜遊擊陳祥報率同陳大臣胡國
仁等過江被賊圍在垓心只得拚死衝殺馬兵十二名
步兵不計得馬十二匹當蒙二道親見獎賞銀五十兩
又據巡北叙瀘二道報率泰興明等兵照舊防禦納谿

偵探賊勢回巢有向長寧之意因遵持重憲令俟各路
所調兵士盡集訂期進討等情十一月二十日又據遵
義路監軍僉事趙邦清塘報逆賊扶國頑安蠻等聲言
攻打楊栢園又由落紅口過河至地名桃竹壩剗營隨
潑參將侯良桂副總秦衍祥沈崇極次第率兵聯絡進
羅村一帶堵截又據真安路監軍叅政吳國仕塘報相
同又據合江路監軍副使徐如珂塘報於十一月十二
日點發加銜副將羅乾象率兵一萬薛來衍率兵六千
兩路徑取土城與遵義道發兵會合策應又令分理監

紀越同知率兵四千窺中等援納谿等情十一月二十四日又據監紀推官胡平表報稱劄營長寧栗坎逆賊要於二十五日來衝等情到職除一切功次行令辨驗審梟安插有功人員酌量犒賞失事領兵官余躍龍羅汝學羅汝孝王佐等當時鎖拏梟示曹德細打與該路將官鄧懋官俱姑令戴罪立功及行五路萬分隄備四下應援堅壁防禦外看得逆賊父子忽東忽西無日不率衆四出我方措餉調兵猶未畢集遂致受敵失利當俟兵集將至銀數米足始可五路進討用圖撲滅天啓

三年十一月二十六日塘報兵部

加銜侍郎謝恩疏

欽差提督軍務巡撫四川等處地方兵部右侍郎兼都察院右僉都御史臣朱燮元謹奏爲恭謝天恩事天啓二年十二月十四日准吏部咨爲蜀撫勞深績著懇乞特賜加銜以鼓將吏以竟成功事該本部題四川巡撫朱燮元守城有功加銜緣由奉聖旨是朱燮元守城禦賊懋著勤勞著加兵部右侍郎兼都察院右僉都御史照舊巡撫仍候捷叙其餘各官通著優行叙錄欽此備咨到臣卽於本月十七日焚香望闕叩頭謝恩任事訖

竊念臣賦質迂愚抱材庸下居常猶苦躑躅應變更乏
劬勤皇上俯念疆圉特寄節鉞汲深綆短旣人地之相
違食少事煩更愁病之叢集一籌莫展三禩尤寬而茲
者復荷聖慈再頒溫諭晉以貳樞顯秩錄及登陴微勞
恩寵彌增深慶遭逢之異責成轉厚益虞報塞之難况
二賊未俘三方多事醜類恃其黨援出沒靡常將士久
乏資糧情竄難振雖犬馬不忘於圖報而檣櫟終恐其
不材裹革徒懸飲水增凜惟是仰藉威寵勉效馳驅畢
智竭愚誓掃旣稔之惡逆扶傷救死用綏未集之哀鴻

亦有肺肝敢同木石臣無任感恩激切屏營之至天啓
二年十二月十八日具奏奉聖旨該部知道

州縣給由疏略

題爲遵例考覈州縣給由官員事據四川布政使司呈
奉臣批據潼川州申准本州知州陳時宜關稱湖廣黃
州府蘄州人由舉人云云崇慶州申准本州知州曾宇
琦關稱江西撫州府臨川縣人由舉人云云東鄉縣申
准本縣知縣舒顯胤關稱湖廣德安府孝感縣人由舉
人云云遂寧縣申准本縣知縣曹元龍關稱湖廣常德
府武陵縣人由舉人云云呈乞照例會題并開具各種
職考語起送到臣該臣會同巡按四川監察御史張論

考覈得潼川州知州陳時宜端貞肅範節愛流惠綢繆
績茂金湯撫字謳同召杜崇慶州知州曾宇琦直亮不
欺勤勞匪懈四境黍苗膏潤一庭風月淒清東鄉縣知
縣舒顯胤才情斐亶幹局周詳撫字寓于催科砥礪無
慙夙夜遂寧縣知縣曹元龍霞騫遠志玉映清心砥節
不媿影衾臨難獨堅保障各官職業俱修考居稱職除
批令帶俸管事任內行過事蹟徑自造冊差人齎繳五
事冊揭行令咨送部院外理合具題伏乞勅下吏部將
知州陳時宜曾宇琦知縣舒顯胤曹元龍再加考覈酌

議題覆施行天啓二年十二月二十四日具題奉聖旨
吏部知道

塘報各路功次疏

題爲塘報功次事天啓二年十二月二十日據分守川東兼理監軍督餉道叅政吳國仕塘報報稱本月初七日戌時據綏陽縣申報准叅將周之德手本據督令守備陳悌都正極沈朝臣飛報官兵於十一月二十七日督軍至白沙水兵分三路兩枝埋伏接應忽見煙霧騰空賊兵捲地而來駱都司王尚明庾朝榮等排陣接殺良久兩枝奇兵衝出斬首數十級駱都司生擒活功四口花槍二枝鞍馬五副徐仕華親斬馬兵一級奪花槍

一枝賊馬當陣殺死駱都司前營於新土溝洞中搆獲男婦大小七名口又據都司朱天祚稟報生擒奸細一名雲有貴游學增哨下千總柴繼文等百總胡月忠等於十一月二十六日賊從西坪尖坡出沒遇賊截殺斬首級五顆總解赴周叅將驗明等情同日又據該縣申報據督令守備陳悌都正極沈朝臣稟報於十一月二十八日報捷後隨卽進兵止有二路可通栢楊卽分布駱都司駱升高朱都司丁戴二遊擊由右路王尚明庠朝榮等由左路行至地名郭家壩突逢逆賊馬步兵千

餘三職督梯百總姜世龍哨官劉啓勝等王尚明庾朝榮等數騎先衝入賊陣各營兵援接獲功斬級逆賊徐退職等懸賞鼓舞直追時賊正圍栢楊兩相交敵賊喪膽潰遁楊通霑領兵追殺王尚明等亦隨追援獲功一時難叙諮都司王庚徐三人探得賊劉長壽林等情十二月初八日辰時又據該縣報稱本月初三日准周叅將飛報我兵全勝生擒斬首不計千級扶國禎爭一分被獲黃金傘令旗刀器盡拋而走直追入烏江去矣所運餉米盡行運轉收入縣內聽支訖所獲功級俟查明另

報等情同日又據該縣報稱據遊擊戴來鳳都司朱天祚駱麟報稱各職領兵追賊於郭家壩連殺數陣賊見勢大扶國頑楊維新安鑾王倫分三路奔逃各職擒斬功次另報仍發兵追趕俟獲元兇再報等情轉報到道該本道叅政吳國仕看得逆賊狂逞日糾烏合之衆攻圍栢楊固賴我官兵奮勇赴援伏奇衝敵諸賊奔潰四散斬獲賊級活功頗多足寒逆膽則監紀知縣任寵與叅將周之德指縱之畧有足嘉矣除一面移行叅將周之德知縣任寵嚴督將領等官加謹隄防相機進剿所

獲功次候查明另報等因到臣十二月二十三日又據
監軍紀功分巡川北道右叅政閔夢得叙馬瀘兵備道
副使李仙品報稱本月二十一日午時據將官劉養鯤
黑茂何繼光報稱二十一日卯時據兵士喻自忠李二
飛報叅將鄧玠孫劉養鯤等令傳孫監軍紀功二道等
計帶領子姪部兵三百并劉養鯤部下龔惠等勇士七
百胡肇虞部兵二百自十六日渡河十九日三更時分
抵葛石堽見賊劄兩關重門五道各兵奮勇殺入亂砍
賊兵六百餘功內有真苗大苗功一十七人又生擒把

關僞都司一名鄢玠喝止衆兵不許割功乘勝殺入二十里內至寶月寺又分一枝齊打大崖口衆賊潰散鄢玠統兵殺入寺中時正五鼓亂殺苗賊千有餘人將寺并各營寨盡行燒燬所獲槍刀器械牛馬婦女極多俟鄢玠回日另報又招降苗人數百待渡河查數併報等情據此同時又據鄧懋官坐營都司鄭之藩部下千總李現報稱千總劉萬友殺奢僞都司一名接降民一百名生擒活功二名死功二十餘顆據此又據叅軍守備劉養觀塘報相同天啓三年正月初一日又據遵義監

軍紀功僉事趙邦清塘報探得奢寅欲遣崔罵色統石
良等出犯桐梓密行副總秦衍祚叅將侯良柱率兵前
去於天啓二年十二月初十日在石寶寨與賊頭石良
等大戰自寅至辰我兵火砲齊發賊不能支隨據各官
呈解斬獲賊級并擒獲賊婦馬匹刀弩長槍及偽勅書
牌劄諭帖等件到道審得明氏係土長官明正芳之女
供稱今斬獲偽叅將石良係伊夫之父偽都司石永安
係伊親夫偽都司石永鎮係石良姪餘俱苗猓石永鎮
妻羅氏供報相同親驗三惡首級真是元兇及苗級十

二顆生擒男婦三十名口看得此一捷也雖功不至於
多然斬獲石良石永安石永鎮三惡原虎據一方與奢
賊成犄角之勢乃重陷遵義桐梓之渠魁也今幸仰仗
天威剿此元兇秦侯二將亟應紀錄獲功員役均應查
賞以示激勸等因正月初四日又據閔叅政李副使塘
報本月初二日午時據守備劉養鯤胡汝高張學周副
叅等官張令胡肇虞等報稱奉二道密令於天啓二年
十二月二十九日渡江各領兵由赤崖薄刀倒馬等處
分別正路間道於三十日夜冒雨齊出天未明張令與

學周等衝鋒先至宋江賊劄三營張令先圍一營放火
燒起賊出對敵令等殺死馬兵四名賊兵亂走我兵一
擁殺死苗賊五百餘名營壘盡行燒燬生擒僞總兵喻
聯芳樊虎幾爲令所擒止得馬一匹復堵殺馬兵二名
我兵折傷五名賊方奔走汝高又差王友貴等招降男
婦二十餘人陣前所得活功金刀馬匹俟類齊呈解等
情同日酉時又准副總鄧懋官督陣官居敬塘報十二
月二十九日奉李總兵發兵襲剿江門宋江隨統千總
許應啓等兵七百名於正月初一日辰時同劉叅軍張

令等當陣殺死僞守備二名奢賊無數本職親斬三顆
繩守富等於江門放出奢賊小船二十隻又據劉養鯤
等報稱督張英等統兵於赤崖攻打落洞苗寨房屋百
十餘所盡行燒燬田有龍鄢一傳等攻打崖口張村順
崖一帶殺苗目周都司王守備苗賊二百餘名爲照我
兵一時連破逆賊營寨六所俘斬甚多擒賊驍帥大挫
賊鋒酋膽已落其所獲功次俟兵將回日查確另報又
准總兵李維新塘報相同正月初七日又據閔叅政李
副使塘報本月初五日辰時據叅軍劉養鯤贊畫黑茂

督陣何繼光報稱初四日辰時據將官鄢一傳田有龍等回營報稱於初一日四鼓時分一路出蠻洞子共殺苗兵一百一十九功又殺僞都司李應先一功僞守備李從文一功又生擒李應先家兵李七一功又獲婦女二口又將官楊有貴戚倖奇等兵出下落洞共殺七功又同將官鄢一傳等於五鼓時分出大崖口小崖口漏潺子共殺二百五十九功生擒一功以上三枝總共殺功三百八十九功又獲奢崇明所用大關刀一把槍刀五十二件除得功兵士姓名另冊報叙等情同日又准

李總兵塘報相同十二月二十六日據監軍上川東道副使徐如珂下川南道叅政王世仁報稱據仁懷督兵指揮楊元塘報本月十八日酉時職與副總兵羅乾象全哨官兵抵大魚灣劄營分布遊擊袁勲等各守隘路奢寅在土城劄營阿金出竹瓦劄營領兵官袁整拏獲細作八名袁昌袁儀李可才招降苗人羅一相等一百名口又招被苗脅迫之民簡維仲等數十家赴營投降納妻爲質願入伍剿賊正月初四日據加銜副總兵薛來衍報稱於十二月二十三日招降苗民余天明等一

十八家共計七十五名口脫出逆網攜帶妻孥傾心渡河同劉營壘等情十二月二十八日又據監軍道僉事劉可訓塘報准叅將林兆鼎報捉獲奢寅心腹家人臘兒又名闖天滿思謙報稱拏獲奢酋奸細張榮李二供稱奢寅差他出來探官兵多少要出截殺等語同日又據林兆鼎報稱十二月二十七日據塘兵康狗子捉獲幼女一口名喚么女供稱奢崇明見得官兵四集使長寧降民傅啓望同么女前來探聽限二十八日午時回話以便衝出傅啓望走脫正月初三日又據加銜遊擊

再世烘報稱十二月二十八日奉監軍道林叅將令前去明灘擒剿弟抹賽酋已覺逃止將營壘燒燬綁獲逆賊另解探得逆酋已劄青山聚賊將出各等情到臣該臣會同巡按四川監察御史張論看得各路官兵屢戰屢捷斬殺頗多且擒斬首惡十人足以奪賊之氣而賊勢尚欲左衝右突蓋欺我糧餉不就不能深入耳除一切功次行令各道覆驗活功監候獻俘有紀叙及申明五路嚴加備禦相機進討外
月初九日具題奉聖旨該部知道